

Rapport annual 2016

Alla fin digl onn 2016 munta igl inventari dalla Biblioteca Trun 5866 medias, quei 2801 per carschi, 1578 per giuvenils e 1487 per affons. La biblioteca ei stada aviarta 190 dis. Duront quei temps han 1855 persunas visitau la biblioteca ed han empristau biabein 4400 medias.

La primavera havein nus exponiu en biblioteca material sur dil svilup dalla scartira. L'uniun leger.GR ha mess a disposziun cudischs, placats e fegls da lavur. Diversas classas han fatg diever da quella purschida, p. ex. cun scriver cun hieroglifas.

Las giuvnas Lumnezianas Stina Hendry e Flurina Albin han scret il roman da fantasy EMALIO en romontsch sursilvan per giuvenils. Ensemen cul post da lavur da giuventetgna Cadi havein nus organisau sonda, ils 12 da mars, ina prelecziun en biblioteca. Musicalmein ha Chiara Jacomet da Rabiun embelliu quei event. Il publicum ei staus incantaus ed interessaus. Silsuenter havein offeriu in pign refrestg che giuvenils han semtgau.

Annamaria Pfister-Casanova da Schlans ei suenter 20 onns lavur en biblioteca sedecidida da prender cumiau sco conlvrera en biblioteca. Duront ils onns 2010-2015 ei ella stada caubibliotecara. Nus vein schazegiau zun fetg la moda e maniera co Annamaria ha menau il team, sias ideas inovativas e la cordialitad persunala. Nus giavischein ad ella tut bien en sia nova occupaziun sco ustiera e sin seveser en biblioteca sco clienta. Per l'entschatta matg ein las novas conlvreras Rahel Lombriser-Liesch ed Iris Deplazes-Baselgia vegnidas elegidas dalla suprastanza communal el team da biblioteca.

Niev havein nus ina scaffa da turnar cudischs el center communal sper la scala. Aschia ha nossa clientella bunamein adina la caschun da turnar cudischs e CDs. Quella purschida vegn nezegiada stedi, ein buc meins che 300 medias vegnidas turnadas aschia naven dil matg.

Nossas truccas da cudischs per ils bauns da leger ein dil matg tochen october stadas postadas els loghens usitai. Niev havein uonn giu in baun a Surrein, sponsurau dalla vischnaunca da Sumvitg.

Duront il pass da vacanzas dalla Pro Juventute Cadi havein nus astgau separticipar ed envidar affons en biblioteca. Duront in suentermiezdi il fenadur han els visitau nus e discurriu da cudischs e lur lectura preferida, fatg giugs e quizzes.

Per l'jamna bibliotecara dil settember havein envidau il convischin Walter Decurtins da Campliun. El ha raquintau da temps passai. Tier enquala anecdota han era ils presents saviu discuorer da lur regurdientschas. Tier petta e caffè ei la discussiun vegnida menada vinavon.

Ils scolars dil consorzi da scola Sumvitg-Trun han la pusseviltad da visitar la biblioteca cun lur scolasts duront il temps da scola. Igl atun havein nus era envidau ils affonets dallas duas gruppas da tarmegliar da Trun e Sumvitg a far ina viseta.

Per la Biblioteca Trun: *Olivia Pfister-Tgetgel, caubibliotecara*